

開放文學－科幻寓言－蝸觸蠻三國爭地記 第七回 辦警察亭長肆專擅 領徵兵公子慣橫行

蝸牛國辦理警察者，曰葛上亭長【《山堂肆考》：斑貓。一蟲五變：二三月在蕪花上，名蕪青；四五月在王不留行上，名王不留行；六七月在葛花上，名葛上亭長；八月在荳花上，名斑貓；九十月即遷地蟄，名地膽】。舉紳士赤弁丈人【《古今注》：蜻蜒，一名赤弁丈人】為副董。外似整飾，而內容實不堪問。境內有蚌賊【《爾雅》：食苗心螟，食葉特，食節賊，食根蚌】，竊人之禾，不能究詰。且路政不修，每遇蠻風蠻雨之時，行潦可以游魚。警兵多避居人家蝸舍之下，甚或偷宿花叢，亦不問也。會國家頒行徵兵之制，期藉以整頓陸軍，以彭解為陸軍隊長。彭本將門之子，介胄士也，顧生長華胄，貴不省士卒，重車餘棄梁肉，而卒士或有飢者。軍士惡其無心肝也，稱為無腸公子【《抱撲子》：山中辰日稱無腸公子者，蟹也】。然曾留學海外，入陸軍學校。好擁劍【呂元《蟹圖記》：蟹有十二種，三四擁劍。色黃，其一蟹偏長，三寸餘，有光】橫行，又頗通蟹行文字，故一時聲名藉甚。任用其族子彭其【呂元《蟹圖記》：十二曰彭其，大於蝸，小於常蟹】，終日遊醉鄉，不知所事。曾自言：「泊浮酒池中，足了一生。」【《畢卓傳》：卓嘗言，左手持螯，右手執杯，泊泊浮酒池中，足了一生】聞者譏之曰：「真所謂一蟹不如一蟹矣。」

【《聖宋掇餘》：陶谷奉使吳越，忠懿王宴之，自蝸蚌至彭蚶，羅列十餘種。谷笑曰：「真所謂一蟹不如一蟹也。」】彭解性專橫，尤好龍斷。曾侵越警察權限，一時蝦兵蟹將，雜沓麇集。彭解麾下兵，亦冒蚌賊之名，取人田間稻穗，以致積不相能。

時有徵兵斑螯【《本草》時珍曰：斑螯，人獲得之，尾後惡氣射出，臭不可聞。故其人藥專主走下竅，直走精溺之處】，行於道，將私焉。警察干涉之。徵兵持警察短長，互起衝突。赤弁丈人，儒者也，出為排解。徵兵怒，見丈人冠儒冠來，輒解其冠，溲溺其中【《史記·酈生傳》：沛公不喜儒，諸客冠儒冠來，沛公則解其冠，溲溺其中】。彼此遂相爭哄，互有殺傷。上官聞之，大怒，將澈底根究。然彼此互持所短，以相攻訐，兩不相下，而又各自知底蘊之不可以告人也。故外強中乾，色厲內荏。後經蝸人【《周禮》：調人掌司萬民之難而諧和之。蝸調音同，假用】出為排難解紛，並向上官處為之關說，兩造和息，事遂侵。正是：
驀驚同室操戈起，兩鼠何緣鬥穴中。